

"Plan pa Desaroya Nobo"

MEDIO AMBIENTE LO HAYA SU ATENCION

MERECI DEN E PLAN



San Nicolas Master Plan & Historic Sites Assessment

ORANJESTAD (AAN): Un di e aspectonan interesante di e plan cu a diseña pa e "desaroyo nobo" di e parti sur-este di Aruba, ta e parti di medio ambiente. No solamente pasobra e ta necesario pa preserva nos naturalesa, pero mas ainda pasobra a haci uso asina creativo di e areanan disponibel, e proposicionnan pa destina un parti grandi di nos isla pa area preservá y e plan pa recoleccion di awa.

PARTI "PANORT" DI ARUBA: E parti di costanan rond di nos isla y e parti di California te cu Sero Colorado lo keda destina como area preserva. E pida garandi aki di nos isla ta inclui e Parque Nacional Arikok y Spaans Lagoen. Den e area aki no lo por tin construccion di cas y otro edificionan. Di e forma aki un parti sumamente bunita di nos isla hamas lo por worde afecta pa construccion, industria etc. E area aki ta keda destina pa recreacion y e facilidadnan necesario pa esaki. E construccion di cayanan lo keda limita, pero si

ta propone pa traha camindanan pa bicicleta core; den henter e area di naturalesa preserva aki. E camindanan y rutanen di bicicleta lo cubri un distancia di mas o menos 40 kilometer y lo ta serpara for di caminda pa autonan. Aunke parcialmente e lo core paralelo na esaki. Por ehempel banda di nos playana. Pa nos hendenan mes y pa bishitantenan, Aruba tin mas cu ofrece cu su playanan bunita. E plan aki ta netamente pa halza e aspectonan lubida aki y pa acentua e caracter di nos naturalesa. Den Parque Nacional Arikok lo sigui preserva nos flora y fauna y di e forma ey haci nos mes, nos futuro generacionnan y bishitantenan mihor conoci cu nos naturalesa.

URBANISACION Y NATURALES BON BALANSA: Interesante ta pa wak con den e plan aki a destina areanan pa urbanisacion caminda lo conserva e caracter di e barionan y permiti construccion nobo, y e areanan pa preservacion di naturalesa caminda no lo

permiti construccion. Di e forma aki a logra un balansa ideal entre urbanisacion y naturalesa y ta elimina e temor hustifica cu tabata tin cu e construccion masivo lo deshaci di hopi di nos naturalesa. Cu e plan aki caminda ta tene bon cuenta cu tur dos necesidad, e temor aki ya no tin mester di existi, aunke cu DOW ta tene bon cuenta cu esaki ora di duna permiso pa traha cas.

INFRASTRUCTURA PA RECOLECTA AWA:

E necesidad pa un forma mas responsabel di recolecta awa uzá ya ta bisto den e parti sur-este di Aruba. Awor aki pa mayoria parti industria, negoshi y famianan ta haci uso di sistemanan di beerput, septic-tank y hasta descarga directo di awa sushi pa laman. E daño na nos awa, flora y fauna coastal ta e consecuencia di esaki y un cantidad di awa cu lo por worde uzá di nobo pa irrigacion di matanan, parkenan, etc. ta bai perdi. Cu e renovacion y construccion di un cantidad grandi di

cas nobo den e area di Savaneta, Brazil, San Nicolas, y necesidad pa cuida nos awa, recolecta y uza esaki di nobo ta bira mas grandi. DOW a crea den e cuadro aki un plan pa recolecta y re-uzá awa den henter e region di

"pariba di brug" cu lo encera tratamiento di awa sushi cu facilidadnan moderno. Cu esaki otro parti di nos medio ambiente ta keda bon cuidá den e "plan pa desaroyo nobo" pa San Nicolas y vecindario.